

01 NOV 2003

Putin-Abdullah/I

PUTIN UCAP TAHNIAH ATAS PELANTIKAN ABDULLAH

KUALA LUMPUR, 1 Nov (Bernama) -- Presiden Rusia Vladimir Putin mengucapkan tahniah kepada Perdana Menteri baru Datuk Seri Abdullah Ahmad Badawi yang menggantikan Tun Dr Mahathir Mohamad.

"Saya yakin di bawah kepimpinan anda, Malaysia akan meneruskan cara dinamikinya dalam mencapai kemajuan dan kesejahteraan...Terus mengambil pendirian aktif dalam arena antarabangsa, memainkan peranan konstruktif dalam badan antarabangsa termasuk Pertubuhan Bangsa-bangsa Bersatu (PBB), Pergerakan Negara-Negara Berkecuali (NAM), Pertubuhan Persidangan Islam (OIC)," katanya dalam perutusan tahniah kepada Abdullah.

Salinan perutusan itu difakskan kepada Bernama oleh Kedutaan Rusia di sini hari ini.

Putin yang menghadiri Sidang Kemuncak OIC ke-10 di Putrajaya bulan lepas sebagai tetamu khas, berkata beliau masih mengingati pertemuan mesranya dengan Abdullah di Putrajaya.

Katanya, beliau berharap jalinan interaksi dengan Abdullah akan terus dipupuk bagi meningkatkan hubungan mesra antara Rusia dan Malaysia.

Putin juga mengulangi jemputannya kepada Abdullah untuk melakukan lawatan rasmi ke Rusia. "Saya ucapkan segala kejayaan dalam menjalankan misi penting anda," katanya.

Semalam, Abdullah secara rasmi mengambil alih jawatan sebagai Perdana Menteri kelima dengan mengangkat sumpah jawatan di depan Yang di-Pertuan Agong Tuanku Syed Sirajuddin Syed Putra Jamalullail di Istana Negara di sini.

-- BERNAMA

NER AZZ DC MOZ